

seront chastiez, & que ceux qui croient en son vnité & qui font de bonnes œuures, receuront vne recompense infinie.

LE CHAPITRE DES SIGNES
cœlestes, contenant vingt versets,
escriit à la Meque.

Plusieurs Docteurs l'intitulent le Chapitre des Chasteaux.

AV nom de Dieu clement & misericordieux. Je iure par le Ciel orné de signes, par le iour du iugement, par les Anges & par les hommes, que ceux qui ont fait des fossés remplis de feu pour brusler les vray-croyans, seront tesmoins de leurs propre malice, & aduouèront que le feu les a bruslé eux-mesmes, pour leur faire cognoistre l'vnité de Dieu, & la verité de sa loy; Dieu est tout-Puissant & tousiours victorieux, il est Roy des Cieux & de la Terre, il void tout; Ceux qui tourmenteront les vray-croyans & ne se conuertiront pas, seront damnez, ils brusleront eternellement dedans le feu d'Enfer, & ceux qui croiront en Dieu & qui feront de bonnes œuures demeureront dans des iardins delicieux où coulent plusieurs fleues où ils iouïront à iamais d'une suprême felicité. La colere de Dieu est forte, il fait mourir, & ressuscciter

ses creatures quand bon luy semble, il est misericordieux enuers ceux qui se repentent de leurs pechez, & ayme ceux qui le seruent. Il a creé son Trosne auquel loüange est eternellement deüe, il esleue qui bon luy semble, & rien ne luy est impossible. As-tu ouï l'histoire des gens de Pharaon & de Temod? Dieu chastiera de mesme façon ceux qui ne croiront pas en sa loy, il les cognoit tous. Certainement l'Alcoran precieux est escrit dans le liure qui est gardé au Ciel.

*LE CHAPITRE DE L'ESTOILE,
ou de la Tramontane, contenant dix-sept
versets, escrit à la Meque.*

AV nom de Dieu clement & misericordieux. Je iure par le Ciel & par l'Estoile qui enseigne le chemin aux hommes. Je ne te diray pas par quelle Estoile, par l'Estoile pleine de clairté, que chaque personne à vn gardien (qui obserue le bien & le mal qu'elle fait.) L'homme ne considere-t'il pas de quoy il est cree? Il est cree d'un peu d'eau respandüe, qui sort du corps de l'homme & de la femme; Dieu le fera ressusciter au iour du Iugement & personne ne le pourra proteger ny deffendre de la colere de sa diuine Majesté. Je iure par le Ciel qui renuoye la pluye, par la terre qui s'ouure & la reçoit pour produire ses fruiçts, quel'Alcoran distingue le bien d'auec le mal,